

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacuã nda. Aico ã mbesa jêje a. Nanderesenda Sóstenes ndese aico embesa jêje a. ² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rñ ãquĩ. Dios riqui jemingo icúe umbaerã ãquĩ. Sã Dios riqui mangue jenda chooñoa mingó icúe umbaerã no, eĩ si. Ñee mose Jesucristo je. Jesucristo rei ãquĩ abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rñ nda. Nyebe aico nguiã gracias i tuchi Dios je jenñ co. ⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiato tuchi ucheẽ nenei nenei sacuã mbia je. Jembaaracua tuchi que ucheẽ nñ nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ãquĩ cote. ⁷ Nyebe Dios turã ndiqui nguiã huĩ ãte jêsi co. Jembirãcuã mbeite equia querabe co. ãquĩ jêingo Jesucristo raarõ arõ ãquĩ. ⁸ Dios ra jembirãcuã mbei mingó mbae ua ja chee. Mbia mo nda ñee icuã eã jêje Jesucristo tu mose.

⁹Dios ra jendeaquiatu bei. Ucheẽ nda embuchebiã mbei ñeende jêje. Ae quiatu ngue ñee nguiã jêje. — Taemingó bei seriirĩ ndese Jesucristo rese, i.

Jesús quiato nyao nyao chõchĩ nyesi

¹⁰Seresenda, nandererecua ja chõ Jesucristo resẽ. Jenyao chao mose nyesi, eicuãte ãquĩ. Hue rĩ ja chõ jẽingo ndua ndua. Mbae mii ndese chõ jẽingo. ¹¹Mbia quiatu ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jeniã nda. ¹²—Pablo mbae chõ se re, i chõchĩ jemo nguiã serĩ ãquĩ. —Apolos mbae chõ se re, i chõchĩ jemo nguiã ãquĩ no. —Pedro mbae chõ se re, i chõchĩ jemo nguiã no. —Cristo mbae chõ se re, i jemo no. ¹³¿Cristo mbuchao chao ji ere no? ¿Pablo mano jendiquicharõ nde no? ¿Pablo rĩ bautizar i jêje re no? ¹⁴Se que bautizar ae eã jêje resẽ. Crispo mii je que bautizar ae ra. Gayo je abe. ¹⁵—Pablo rĩ ño ngue bautizar i nguiã seje, i aroneate jemo ñee serĩ. ¹⁶Estéfanos chuchua jenda abe que bautizar ae ra. Aquere que bautizar ae ãte jemo je ra. ¹⁷Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, i nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rĩ

¹⁸Ae ra nyoĩ tata cuásuu, ãquĩ ndei “ichõĩñosa” isa Dios cheẽ nenei neneisa rĩ. —Cristo que mano mbia riquicharõ nda, i mose ee, “ichõĩño ñene”

ĩ chõ nguĩã. Nande quiatu que Dios nanderirõ nandeicuã si ra. Nyebe Dios cheẽ turã ndiqui nguĩã uquirãcuã ndeacuquia nande je co. ¹⁹ ã ndei Dios cheẽ mbesa ji ã:

Ae “seaquiatu tuchi” ĩ quia, ãquĩ aquiatu ra am-
buquiachã esi.

Ae “searacua tuchi” ĩ quia, ãquĩ aracua abe ra
ambuquiachã esi no,

ĩ que Dios cheẽ mbesa ji ra. ²⁰ Ae uaquiatu saã
saã nguia, ibi jenda ja chõ ãquĩ nde. Ae ucheẽ
aquiatu saã saã nguia, ibi jenda ja chõ ãquĩ no
nde. Eaquiatuãte ãquĩ, ĩ chõ Dios nguĩã ãquĩ je.
²¹ Mbia ae ra Dios icuayã mbei uaquiatu ae je. Dios
cheẽ ae je quia nda mbia Dios icua nguĩã emo
Dios cheẽ nenei nenei mose ee. Ae Dios cheẽ isi
nae, ãquĩ nda Dios sirõ eicuã si. Ichõĩño nguĩã, ĩ
raque mbia ataque Dios cheẽ nĩ. ²² —Mbia mae
sayã ndese nda uremae na ña, ĩ bei que judíos
quia ra. —Urechimbaaquiatu tuchi rã, ĩ bei que
judíos eã nguia ñee nyue no nda. ²³ Nande quiatu
Cristo nandesenei senei nguia ã. Ae mbia mbucha
quia ira rese, aque chõ nandesenei senei nguia
nande ã. ãquĩ si judíos ireĩte riqui ã. Cristo renei
nenei mose, judíos eã ndua eã tuchi chõ nguĩã
ereše ã. ²⁴ Nande quiatu nandebite riqui nguĩã
Cristo renei nenei mose ã. Dios judíos mo irabo
chõ nguĩã. Judíos eã mo abe irabo chõ nguĩã no.
ãquĩ je chõ ngue Cristo Dios quirãcuã mee nguĩã.
ãquĩ je chõ Cristo Dios aquiatu mee nguĩã. ²⁵ Dios
aquiatuãte, ĩ raque mbia mo ñee Jesús mano je rĩ.
Dios quia eaquiatu tuchi jiri riqui nguĩã mbia si co.
Dios quirãcuã neate, ĩ raque emo ñee no. Dios quia

equirãcuã tuchi jiri riqui nguiã mbia si co.

²⁶ Dios que jêirabo ja ra. Jêaquiatu tuchi eã ndaque ee. Ererecua eã ndaque jê. Mbaecha eã ndaque jê. Dios ae chõ ngue jêirabo nguiã. Ũquí ndese jendua jiri. ²⁷ Ae je mbia riqui “eaquiatuãte” i nae, ũquí ño ngue Dios irabo nguiã. Ae ucuasu saã saã nguia nae, ũquí ireĩ ireĩ sacua esi. ²⁸ Ae mbia ataque ucuayãte quia nae, ũquí ño ngue Dios irabo nguiã. Ae ucuasu saã saã nguia nae, ũquí mbutiã sacua. ²⁹ Nyebe nandeco nguiã nandeaquiatu raã naa aroneate Dios je ã. Nande m# mo jiri jiriã. ³⁰ Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹ Sã embesa ji riqui ñee ã no:

Ae Dios saã nande je nae, ũquí n# nandechee turã. A e nandesã nande ae nae, ũquí n# nandechee turã eã,
i que embesa ji ra.

2

Jesucristo m# Pablo senei senei mbia je

¹ Seresenda, seso mose jendea que Dios cheẽ asenei senei turã jêje huee resẽ. Seaquiatu asaã saã eã ño nguiã jêje Dios cheẽ nenei nenei. ² — Jesucristo m# ño tasenei senei jêje. Jesucristo mano nguia mbia icuã ndiquicharõ nae, ũquí m# ño tasenei senei jêje, ae chõ ngue oso nguiã ñee jêje. ³ Seireite que seso mose ñee jêje nyii ra. Semburirite que aque mose ra. ⁴ Seaquiatu que

asaã saã eãte quia ra. Dios cheẽ ngue ambuchecua tuchi quia ñee ñee jêje ra. Espíritu Turã nguiatu que secheẽ mbirãcuã tuchi quia ñee ñee jêje ra. Nyebe mbia ñee nguiã. —Dios cheẽ ño eriqui re, i nguiã secheẽ mose. ⁵ Dios quirãcuã ae jemingo nguiã Jesucristo rese ãquĩ. Mbia mo aquiatu eã ño jemingo nguiã Jesucristo rese ãquĩ.

Espíritu Turã ndiqui mbae icua jate nande je co

⁶ Ae seaquiatute, ãquĩ ja chõ asenei senei mbei nguiã Jesús quiato je co. Ae seaquiatute nae, ibi jenda rã eã ño seaquiatu riqui nguiã co. Ae seaquiatu nae, ibi jenda rerecua rã eã ño seaquiatu riqui nguiã co. ãquĩ aquiatu quia ra tiã jei. ⁷ Ae ureico ñee ñee nae, ãquĩ nguia mbia mbaaquiato jiri nguiã. Dios cheẽte quia ñene. — Secheẽ nda ambuchecua je nguiã mbia je. Mbia mingo bei sacua, i que Dios nyii mbae ao nonde ra. Dios que esenei eã nyii ra. Namu ño embuchecua nguiã nande je cote. ⁸ Mbia rerecua que Dios aquiatu icua eãte ra. † nda eriirĩ mbucha eãte rei ira rese. ⁹ Sã embesa ji riqui ñee ã no:

Dios ra mbae turã saã tuchi nande je. Uchesequa je.

Ae ra Dios saã nande je, ãquĩ ndese emo iranuate namo.

Emo mae ãte erese namo, i que embesa ji ra. ¹⁰ Nande quia nandeico nguiã irandu erese ã. Espíritu Turã quiatu nandembiirandu nguiã. Espíritu Turã nguia mbae icua jate nguiã co. Dios chiaõ abe icua jate equia co. ¹¹ Ae rese emo ndiqui ndua, mbia mo ãquĩ ndua ndua icuayãte. Ae rese nandeico ndua, nande

ae nandeicua nguiã. Ae rese Dios riqui ndua, Espíritu Turã mii ño eicua nguiã. Dios sí chõ Espíritu Turã nde. ¹² Dios que espíritu mbuae mo monoã nande je ra. Espíritu Turã ño ngue emondo nguiã nande je. Ae Dios saã turã nguia nande je nae, ùquĩ ndese nandembiirandu sacua ño ngue Espíritu Turã mondo nguiã nande je. ¹³ Ae Dios saã turã nguia ure je nae, ùquĩ uresenei senei nguia ã. ã ndese chõ ngue Espíritu Turã urembaaquiato nguiã. Mbia cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ùquĩ sí Espíritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte. ¹⁵ Ae Jesucristo icuate nae, ùquĩ nguia mbae icua jate nguiã ã. Ae eturãte nae, ae eicuãte nae, ùquĩ icua ja equia ã. ¿Mañi Jesús quiato quia re? i chõ mbia nguiã Jesús quiato cheẽ icuayã ã. ¹⁶ Tarembaaquiato, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mii na ño ureico nguiã Dios cheẽ nenei nenei

¹ Jesús resenda jẽingo raque ùquĩ. Jẽingo tuchiãte quiatu nguiã erese ùquĩ. Ae jembite riqui nae, ùquĩ mii ndese chõ jẽingochĩ nguiã ùquĩ. Ae Cristo bite nae, ùquĩ ndese jẽingoã ñochĩ nguiã ùquĩ. Nyebe jaembaaquiato tuchi aroneate equia

co. ² Mbia ririĩ na ño jẽingo chĩ nguiã secheẽ andu mbirĩ mbirĩ cose. Querabe chõ jẽingo nguiã secheẽ andu sereã ùquĩ. Nyebe jaembaaquiatu quiatu tuchiã nguiã Jesús cheẽ ndese. Ae jembite riqui nae, ùquĩ ndese jẽingo mose ra Dios cheẽ jẽicuayã mbei. ³ Jẽicuã icuãte quia jẽingo nguiã jenyue ùquĩ. Jendua turã ja eãte equia ùquĩ. Jeñee turã turã eãte quiatu nguiã jenyue ùquĩ. Nyebe acheẽ nguiã jẽje. —Ae Cristo bite nae, ùquĩ ndese jẽingoã ñochĩ nguiã ùquĩ, ae chõ ndei nguiã jẽje co. ⁴ —Se rei Pablo mbae, i chõchĩ jemo nguiã ñee ùquĩ. —Se rei Apolos mbae, i chõchĩ jemo no. Nyebe jẽingo eã nguiã Cristo bi rese ùquĩ.

⁵ ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jẽje que Jesús jẽicua resẽ. ⁶ Mbae tiquia ji rã ño jẽ nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jembaaquiatu quiatu nguiã cote. Dios quiarei ucheẽ mbusuri raanguia jeñiangui re. ⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherẽ cherẽ nguia erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰ Dios turã tuchi que seje ra. Seje quiatu ngue ucheẽ mee nguiã. Mbia mbaaquiatu quiatu sacua.

Tuchua ao aquiatu rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹ Tuchua i raanguia chõ Jesucristo riqui nguiã. Ae mi tuchi chõ tuchua i raanguia re. ¹²⁻¹³ Ae arõ tuchua mo nandesaã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ñquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja. ¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandesí. Nande quia ra nandequiachãya ndaque. Nandecuasẽ ndaque ra ibate Dios je. Nandechi quiatu ra nandeco cote.

¹⁶ ¿Jêtesarei chõ ere? Dios chuchua chõ nanderete riqui co resẽ. Dios riqui beite nandeye co. Espíritu Turã ndiqui beite nandeye co. ¹⁷ Emo Dios chuchua mbiçuã mose, aque ra Dios mbutiã. Nande quia Dios chuchua re. Dios que uchuchua mi icúe umbaerã nda. Nanderete je sichõ nandeco nguiã ñee co. Dios chõ nandemingo nguiã icúe umbaerã co.

¹⁸ —Nandeaquiature, jenyechĩ nguiã jeñiangui re ñquĩ. Ae equiature ibi jenda achõ ndese, sã ñquĩ uquiature raã naa eã. Siqui mingue mose ra Dios embaaquiature turã cote. ¹⁹ Ae equiature ibi jenda achõ ndese, “equiature”, i chõ Dios nguiã ñquĩ je co. Sã embesa ji riqui ñee no:

Dios ra ñquĩ aquiature mbutiã ño cote.

“Seaquiatsu tuchite aico co”, i quiatuchĩ ngue nyii re,
 i que embesa ji ra. ²⁰ Sã embesa ji riqui ñee no:
 Ae rese eaquiatsu riqui ndua nae, ũquĩ Dios icua
 tuchite quia co.

Ndua ndua iru chõ nguiã,
 i que embesa ji ra. ²¹ ¡Mbia aquiatsu mo ndese ra
 jeñimbucha chooñochĩ jẽ! Dios quiatsu que mbae
 mondo ja jẽje ra. ²² Jembae chõ se re. Apolos abe
 rei jembae no. Pedro abe rei jembae no. Mbae ibi
 jenda ja rei jembae. Dios mbia mingo mose, jẽje
 chõ emingo. Dios mbia mingo eã mose, jẽje chõ
 emingo eã. Ae siqui quia namo, jembae ja chõ ũquĩ
 nde. Ae ra siqui aquere, jembae ja chõ ũquĩ no nde.
 Jembae ja chõ ñene. ²³ Cristo mbae chõ jẽ nde. Dios
 mbae chõ Cristo no nde.

4

*Ureaquiatsu tuchi Jesús chimbaaquiatsu si,
 jenyechĩ nda jẽ*

¹—Cristo rimba ja chõ ũquĩ nde, jenyechõ serĩ.
 Apolos rĩ abe no. —Ae ambuchecua eã mbia je
 nyii, ũquĩ jembuchecua checua mbia je serĩ cote,
 i que Dios ure je ra. ² Dios rimba mose nande,
 Dios cheẽ nandemumbayã mbei chõ nguia. ³—
 Serimba turã ño nde re, i ra Dios seje reae. Ndu-
 cuã. Aicuayãte se. —¿I se jẽje re? ae ãte se quia jẽje
 co. Ae ãte se quia emo je co no. Dios mĩ ño seicua
 nguiã. ⁴ Dios rimba turãte aico reae. Dios ae chõ
 seicua nguiã. ⁵—Dios rimba turã ño aque re, jjenye
 jeichĩ nda emo nĩ jẽ! Jesucristo tu mose, ae quia
 ra mbae mbuchecua ja. Ae ra nandendua ndua

mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiato sacua ño aico nguiã ñee jêje co. Sechue si chõ aico nguiã ñee. Apolos rii abe chõ aico nguiã ñee. Dios rimba achõ ño ure re. Ure mii mo ndui jêingo bei aroneate. Dios rimba ja rui chõ jêingo. Eijenye mose ra embesa ji jemumbayã. ⁷ ¿Mbaerã nda jêcuasu jêsaã saã nde? Ae jendeco jembaerã nae, Dios chimondo ja chõ ñquĩ nde. Jêaquiato mose, Dios ae jembaaquiato nguiã. —Se ae que sembae asaã saã nda, jjenyechĩ nda jêcuasu raã naa jê!

⁸ —Ureaquiato tuchite cote, jjenyechĩ ngue ñee nda. —Ureico Dios cheẽ icua jate co, jjenyechĩ ngue ñee no nda. Ererecua tuchi jêsaã saãchĩ ureririrõ cote. Ererecua jêsaã ñooño na jê no. Se abe ra ererecua asaã saã ndei jê na ndeae. ⁹ Dios ucheẽ nenei neneisa quirirõ jiri ure reae. Mbia tarõ ji rã ño ureico uremano ndaarõ arõ ndeae. — ¿Mañi ã nguia re? i tuchi mbia quia mae nguiatu urerese co. Angeles abe ñee nyee mae nguiatu urerese. ¹⁰ Ureico tuchi mose Cristo rese, “eaquiataã”, jenye chõchĩ equia ure je ñquĩ. “Ureaquiataute ure”, jenye chõchĩ equia jê jêingo mose Cristo rese ñquĩ. Urequirãcuã neãte ure, jê jêquirãcuã mose. Mbia ureosei chiãte ure; jê nguia mbia jêoseite nguiã. ¹¹ Mbae eã mbeite urembae namo abe. Urieriãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icuã icuã mbeite ure je. Urechuchua eãte abe no. ¹² Mbae ursaã saã tuchite quia ureo je co. Mbia icuã

icuã mbeite riqui ure je co. Urecheẽ turã turã mbeite equia ure ee ã, ãquĩ ñee icuã icuã mose ure je. Urehecua chõte equia ñimbirãcuã ee ã. ¹³ Urecheẽ mingue beite equia ãquĩ ñee icuã mose ure je ã. Mbae quía rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴ Jẽireĩ ireĩ sacua eã ño aico nguiã ã mbesa jẽje ã. Jemundua ndua sacua ño ñene. Seriiĩte quia jẽ nde. ¹⁵ Jembaaquiato quiatusa tubiriãte raque Cristo rĩ. Se mi tuchi chõ jendu re. Se rane nguiatu ngue echeẽ turã asenei senei nguiã jẽje nyii. Se quiatu ngue Cristo aicua uquia nguiã jẽje. Nyebe aico nguiã “seriiĩ” i beite jẽje co. ¹⁶ Nyebe jẽingo se rã si. ¹⁷ Timoteo amondo quia jẽje aque. Ae rei sechimbaaquiato tuchi. Nyebe “seriiĩ” ae tuchi nguiã ee. Ae quiarei siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eĩ ngue Pablo quia Jesús quiato mbaaquiato quiato sucha mbuchesea sea mose ra, i ra Timoteo jẽje seriiĩ. ¹⁸ Jemo ndiqui uaquiato raã naa tuchi chĩ ãquĩ. —Pablo ra tu eã mbei urerea, i chõchĩ jemo nguia seriiĩ ãquĩ. ¹⁹ Aso jei ra jendea, Dios eno i mose seje. Ae uaquiato saã saã tuchi quia jemo nae, ãquĩ tatea cote. Mañi nda equia mbae raã ndeae. Echeẽ achõ achandu sereã. ²⁰ Dios rimba cheẽ achõ aroneate. Siqui eã mose Dios quirãcuã ndese. ²¹ Manyae ra jẽje seso mose jendea reae. Acheẽ asi asi ra jẽje reae. Aico mingue chõ nda jẽje renoae. Jẽhui mose jẽicuã si, acheẽ asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jêataque jêtea choõño mbae icuã naa mose re? Ae Jesús quiato ãte nae, ãquĩ ño siqui ãte ngu ninisi rese. ¿Mbaerã Jesús quiato quiatu siqui ngu ninisi rese re? ² Jêturã jêsaã saã mbei chõchĩ nguiã jê ãquĩ. Jêya eã eã ño jêingochĩ ãquĩ ndese ãquĩ. Jêireĩ ngũĩã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishote aico raque jêsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵ Ae siqui ngu ninisi rese nae, aque jemombo chõ jêsi. Jesús quiato si. Jemee ño Satanás je. ¶ nda Satanás erete mbasi. ¶ nda eã siqui bei Jesucristo tu mose cote.

⁶ ¿Mbaerã jeingo jêturã naa naa mbae icuã ndea choõño nde? Levadura rã ño mbae icuã nde. “Levadura ñetê nda oso raque mbichae raã namo mose. Mbuchimatã ja rae”. ¿Ãquĩ jeñanuãte quia re? ⁷ Ae eicuãte nae, aque jemombo jêsi. ¶ nda jê abe mbae icuã jêsaã eã. Dios que Jesucristo iquia nandeïcuã ndibishorõ nda. Sã mbia riqui oveja iquia iquia huïcuã ndibishorõ no. ⁸ Nyebe nandeïco turã na Dios rese, mbae icuã naa naa ndocoï. Cohee nandeïco. Nandeïcuã nandesecha ja.

9 —Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jẽje nyii. ¹⁰ Ae Jesús quiato áte, ùquĩ nĩ eã ño ngue acheẽ nguiã jẽje. Nandecheẽ eã aroneate Jesús quiatoã je nandeico mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ùquĩ je nandecheẽ eã aroneate. ¹¹ Jesús quiato mo ùquĩ icuã naa mose, jemombo chõ jësi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia chooñoã mose. Quiacua mose. Mbae mbuquiachã mose. Jesús quiato ùquĩ naa naa mose, jêhui chõ esi. Jêquiaru jiri jiriã tuchi ùquĩ ndese. ¹² Jesús quiatoã nandeteaquiato aroneate. Ae Jesús quiato, ùquĩ nguiatu nandeteaquiato. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jësi.

6

Jemo icuã icuã mose nyue, jẽ ae chõ jëingo

¹ Jemo icuã icuã mose nyue, jësochĩ nguiã ñee Jesús quiatoã nderecua je. Jẽ ae chõ jemaere ere ae. Jëicua ae. Sã Dios quiato achõ ño ñee ùquĩ je. —¡Eĩ jenye jẽ! i ùquĩ je. ² Dios quiato quia ra “¡eĩ jenye jẽ!” i ja Dios quiatoã je emo mose. Jẽ nguia ra “¡eĩ jenye jẽ!” jenye mbia ataque je emo mose. ¿Mbaerã jëingo “¡eĩ je nye jẽ!” ise reã mbae ñetẽ naa mose re? ³ Angeles je abe chee ra “¡eĩ jenye jẽ!” nande. ¿Ùquĩ ndese jëiranuãte re? ã ibi jenda je “¡eĩ

jenye jê!” nande turã ja rã ae. ⁴ Jesús quiato chõ jê nde. Ibi jenda mo ñi jemo icuã icuã mose nyue, jê ae chõ jemaẽ ùquĩ ndese. Jẽsochĩ nguiã ñee Jesús quiatoã nderecua je. Dios quiato eãte quia ùquĩ nde. ⁵ Jesús quiato mo ñee icuã icuã mose nyue, ¿jemo jẽaquiatuãte ñee ee re? “¡Eĩ jenyẽ jê!” i ee re. Jẽ jẽireĩ ireĩ sacua ño aico nguiã ñee jẽje ùquĩ. ⁶ — ¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echia turã tuchi ãte quia ñene. Jeñimbirãcuã ño mbae icuã naa mose jẽje. Jeñimbirãcuã ño jembae mbuquiachã mose no. ⁸ Jẽ abe mbae icuã jẽsaã saã ñochĩ, ñimbirãcuã ndocoĩ. Jẽ abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquiã tuchi Dios rese. Ae siqui emo ninisi rese nae. Ae siqui ngüinisiã ndese nae. Ae ndua chooño nguia Dios abareã ndese nae. Ae siqui quia nyiese ngüinisi raã naa nguesenda je nae. Ae mbae mbuquiachã quiachã nguia nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ùquĩ nda siquiã tuchi Dios rese. —Eicuã abe ra siqui bei Dios rese, jjenyechĩ nda ñimbirĩ irĩ jê! ¹¹ Eĩ ngue jemo icuã cose ra. Dios ae jembitorõ nguiã cote. Dios chõ jemñi nguiã icúe umbaerã cote. Espíritu Turã ngue jẽisi turã Jesucristo rñ cote ra.

Espíritu Turã nyuchua chõ jendete re

12 —Co rese ra ereicochĩ, i ãte raque Dios quia seje mbae mo nĩ. Dios biãte nande mbae raã ja chooño mose. Mbae mo sembiãcuã serĩ mose, asaã eã mbei ra se. 13 Nandechiurã ndei nanderie ye sacuã. Nanderie rei nandechiu rirurã. Ũquĩ ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecua chõ Dios re. 14 Dios quirãcuã ño ngue Jesucristo raaque mbuquera nguiã. Eĩ ño nda Dios quirãcuã nanderaaque mbuquera nguiã nande abe no. 15 ¿Jẽiranuãte quia jendete rese re? Cristo nanderete mbucha quia uchiese co. Cristo rete chõ nandeco nguiã co cote. Cristo rete nandembucha aroneate cuña icuã ndete mo ndese. 16 Emo siqui mose cuña icuã mo ndese, erete ucha chõ nguiã nyiese aque. Erete nyeremo eã ño cote re. Ũquĩ ndete ja ra co miĩ cote, i que Dios cose ra. 17 Emo siqui mose Cristo rese, nguete mbucha chõ nguiã erese ũquĩ cote. Erete miĩ na ño ũquĩ cote re. 18 ¡Jeninisiã ndese ra jẽingochĩ jẽ! Mbae icuã mo naa mose, ũquĩ nda nanderete mbiãcuãyã jiri. Siqui mose ngũinisiã ndese, ũquĩ nguia ra nanderete mbiãcuã tuchi cote. 19 Espiritu Turã siqui chee jeñiangui re ũquĩ. Espiritu Turã nyuchua chõ jendete re. Dios mbae chõ jẽ nde. Jembae ae eã ño jendete re. 20 Eicuã nimba rei ngue jẽ nyii re. Dios quiatu ngue jẽisi nguiã cote. Nguiĩ ngue emondo jendibishorõ nda. Nyebe jẽingo jendete mee Dios je. Jẽã abe jemee ee noae.

Pablo mbia mbaaquiatu emo ngũinisi rerequia rĩĩ

¹ Jeñee ngue jembesa mondo seje nyii nae, ũquí tasibishorõ jêje cote. Coche emo siquiã nguiã cuña mo ndese. ² Coche mbia ngũinisi ae rerequia nguiã. Coche cuña ngu mĩi nderequia nguiã no. Emo ndese siqui chooño eã sacuã ño ũquí nde. ³ Sã eru riqui turã ngũinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngũinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ũquí. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embĩcuã arõte cote. ⁶ —Jeninisirã jendeco, ae ate quia jêje co. —Jeninisibi mose, jendeco ae, ae chõ nguiã jêje co. ⁷ —Sã Jesús quiato ja ninisiã ndiqui se rã si, ae rei que se ra. Dios cheẽ eã ño ũquí nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngũinisi quereco sete nguiã no.

⁸ Ae eninisiãte nae, ũquí je tacheẽ. Eru cheecha je abe tacheẽ no. Coche jẽingo nguiã jendu eã. Coche jeninisiã ndiqui nguiã no. Se rã si. ⁹ Jeñimbirãcuãyã mose jendete je, jeninisirã mo jêtea ae. Jendurã mo jendeco noae. Mbia mo osei osei rocoĩ.

¹⁰ Ae ngu quereco nae, sã ũquí ngu rechayã mbei. Jesús cheẽ tuchi chõ ũquí nde. Secheẽ ae eã ño ũquí nde. ¹¹ Cuña mo ngu recha mose, sã eriquiã mbei

emo ndese. Sã ae ae chõ ndiqui bei, ñimbucha si eã mose ngu rese. Sã eru abe ngũinisi rechayã mbei.

¹² Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngũinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³ Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngũinisi rese, sã eninisi siquichõ erese no. ¹⁴ Jesús quiato mose eru, eru ngũinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, ãquĩ ande. ¹⁵ Jesús quiato mo ninisi siquíã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquíã mose Jesús rese, “seninisi tasecha” i bei mose, sã eninisi ngu riquisã quisã eã no. ãquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra. ¹⁶ Ae Jesús quiato nae, ãquĩ ngũinisi mingo arõte Jesús rese. Ae Jesús quiato cuña nae, ãquĩ ngu mingo arõte Jesús rese no.

¹⁷ —Eĩ jenye chõ nguia jẽ ae ae, i que Dios nandechiaorã mee mee nande je ra. ãquĩ ndese nandeco bei quiatu nande ae ae. Dios que ñee nande je nyii, aque mosenda rã si bei chõ nandeco. ãquĩ ño asenei senei nguiã Jesús quiato ishonda jaje abe. ¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹ Sebite judíos achõ, iã nda Dios. Sebite judíos

eã achõ, iã nda Dios no. Ae Dios cheẽ mumbayãte quia nae, ãquĩ nguia Dios bite re. ²⁰ Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹ Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²² —Eico serui, i mose Dios mbia rimba mo je, Dios embui chõ nguiã eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³ Jesucristo que mano jêje ra. Nyebe Jesucristo rimba ae chõ jêingo nguiã ãquĩ cote. Mbia rimba ae eã ño jêingo nguiã ãquĩ cote. ²⁴ Dios que ñee nande je nyii, aque mosenda raanguia bei chõ nandeico Dios rese.

²⁵ Nyucuaaque rĩ tacheẽ ndaque jêje cote. Dios que ñee ãte seje ãquĩ nĩ nda. Se ae chõ tacheẽ jêje. Airandu que Dios ia eã mose serese ra. Nyebe aico nguiã ñee ñooño eã tuchi jêje co. ²⁶ Sã mbia ngũinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote. ²⁷ Neninisi mose, eico bei chõ erese erechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ãquĩ no nde. Nyucuaaque ngurã mo ndea mose, eicuã eã ño ãquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jêje. —Jê ae jêingo jeninisiã, i jêje. ²⁹ Tacheẽ tuchi rã jêje, Seresenda. Mbae ra ua jei ja nande je cote. Ae ngũinisi quereco quia, sã ãquĩ ndiqui ngũinisi rerequia eã naanguia. ³⁰ Ae eya eãte riqui, sã ãquĩ ia tuchi raanguia riqui no. Ae

eyate riqui, sã ùquĩ ia eãte raanguia riqui no. Ae mbae isi quia, sã ùquĩ ndiqui mbae isiã naanguia no. ³¹ ã nandeico rei nguiã íbii ã. ¡Ibi jenda rese ra nandendua tuchichĩ jẽ! ¡ã ibi jenda ja ra ua ja chõ jẽ!

³² —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ùquĩ ndua ndua bei arõte Dios mi ndese. Ae Dios bite, ùquĩ esaã saã mbei arõte. ³³ Ae eninisi nae, ùquĩ ndua ndua bei arondete ibi jenda achõ ndese. Ae eninisi bite nae, ùquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ùquĩ nda esaã saã mbei ee. Siqui tuchi ra Dios rese. Ae ngu quereco nae, ùquĩ ndua ndua bei arondete ibi jenda achõ ndese. Ae eru bite nae, ùquĩ esaã saã mbei arõte. Siqui rocoĩ Dios rese. ³⁵ Jaendiquisã quisã eãte raque se jeninisirã mo ndea mose. Jemundua sacuaã Dios rese chõ aico nguiã ñee jẽje co. Jendua eã sacuaã mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eicuã eã ño nguiirĩ ndurã mee ee re. ³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ùquĩ abe. ³⁸ Ae nguiirĩ ndurã mo mee ee, eturã ño ùquĩ nde. Ae nguiirĩ ndurã mo mee eã ee, eturã tuchi chõ ùquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã

arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ãquĩ ndeae. Espíritu Turã abe sembucheẽ nguia reae.

8

Ae soo mbia mondo rei dios abareã je nae

¹—Mbia soo mondo mondo quia dios abareã je nae, ¿ũquĩ soo ra nandeu re? jenye que seje. Ñquĩ tasenei jẽje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesecua mose mbia rese, Dios abe rese ra nyesecua bei. ² Seaquiatute se, i mose emo, eaquiatuã ño ãquĩ nde. ³ Emo nyesecua mose Dios rese, Dios ãquĩ icua chõ nguia ãquĩ.

⁴ Mbia soo mondo mondo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mii tuchi chõ Dios re. ⁵ Dios abareã nguia etubiriãte re. Ibi jenda. Ibei rinda abe no. Dios raanguia tubiriãte raque no. ⁶ Dios quia co mii tuchi nande je re. Ae quiarei nanderu tuchi. Ae mii ngue mbae chao ja tuchi ra. Ae mii ngue nandeaõ umbaerã nda. Nandererecua mii tuchi chõ siqui nguia co no. Jesucristo, i equia ee. Ae que mbae chao ja tuchi Dios rese ra. Ae mii ño nandemingo nguia ã.

⁷ Dios quiato mo iranuate quia ãquĩ ndese ã. Siquiche beite quiatu nguia dios abareã si ãquĩ. Ae soo mbia mondo dios abareã je, ãquĩ mbaeiaie riqui reĩ nguia ee. —¡Ñquĩ soo jẽu eã jẽ! i reĩ Dios nguia ee. ⁸ Ae nandeu quia nae, ãquĩ nda nandembuturã eã Dios je. Nandechiu mo nda nandembuturã eã mingo. Nandechiurã nandeisi

teã teã mose, ãquĩ nda nandembũcuã eã no. ⁹ — jũquĩ soo ra jẽuchĩ jẽ! iãte raque Dios nande je. Mbaeiaie eãte raque ãquĩ soo. Mbaeiaie nda eriqui reĩ Jesús quiato namonda je raẽ. Jẽ eu mose, ãquĩ abe ra eu chee. —Mbaeiaie au chõchĩ, i ra ñimbũcuã tuchi cote. ¹⁰ Jẽquiaru mose dios abareã chuchua, Jesús quiato namonda ra mae jendese. ãquĩ abe ra soo u chee, ae mbia mondo Dios abareã je. Maende jendese. Eicuã ndaque eriqui reĩ nguiã ee. ¹¹ Jẽ ndaque jẽirandu ãquĩ soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenye chõchĩ ãquĩ mbũcha arõte Dios si. ãquĩ ñi abe chõ ngue Jesucristo mano nguiã. ¹² Soo mbaeiaie riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ãquĩ Cristo je. ¹³ Jesús quiato mo ambũcuã sereã tuchi chõ nguiã se. Se soo u mose, ãquĩ Jesús quiato mo mbũcuã mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguiã Jesucristo icua ãquĩ cote. ² Jesucristo cheẽ nenei neneisa eã ño co re, i arõte raque emo seje. Jẽ quiatu jeñee aroneate nguiã ãquĩ seje. ãquĩ jẽingo seicua tuchite ãquĩ. Secheẽ nguire quiatu que Jesús jẽicua cote resẽ.

³ Eĩ ae chõ nguiã ñee mbia ñee icuã mose seje.
⁴ Se abe Jesús quiato sembuquiaru quiaru aronde-
 dete raque. ⁵ Seninisirã Jesús quiato mo arao
 rao arondete raque mananguiti. Secuata cuata
 mose mbia mbiirandu randu Jesús rĩĩ. Sã Pedro
 riqui ngũinisi rerao rao no. Jesús nongue abe no.
 Sã Jesús cheẽ nenei neneisa ja ngũinisi rerao rao
 no. ⁶ ¿Se mi ño nda Jesús quiato sembuquiaru
 aroneate reĩ jêje re? Bernabé abe rese. Ure Jesús
 cheẽ nenei nenei mose. ⁷ Sã soldado siqui chooño
 eã comandante mbae mee eã mose ee. Sã emo
 ndiqui mbae tiquia chooñoa no. —Sechitiquia nda
 au chã, i chõ nguiã. Sã emo ndiqui ticuasuararõ
 ñooñoa no. —Equiandi nda ambei chã, i chõ nguiã.

⁸ Secheẽ ae eã ño ũquĩ nde. Embesa ji chõ asenei
 nguiã jêje. ⁹ Co rei Moisés chimbesa co:
 Jê ticuasumbuquieĩ quieĩ mose, echuru jemumbi
 eã.

Sã ae ae si quia mbae cua,
 i que embesa ji ra. Ticuasuarachõ je eã ngue Dios ñee
 nguiã. ¹⁰ Nande abe je chõ ngue ñee nguiã. —Sã
 Jesús quiato abe riqui mbae mee mee echeẽ nenei
 neneisa je, i chõ ñene. Ae mbae chitiquia quia nae,
 “sechitiquia tau”, i chõ nguiã etiquia. Ae mbae a
 chiqui chiqui quia nae, “sechiqui tau”, i chõ nguiã
 eiqui iqui. ¹¹ Dios cheẽ ngue uremingue mingue
 tuchi quia jendese resẽ. ¿Jẽ urembuquiaru quiaru
 aroneate quia cote re? ¿Ureiraorã jemee aroneate
 quia ure je cote re? ¹² Mbae mo jemee mee nguia
 Jesús cheẽ nenei neneisa mo je ũquĩ. ¿Mbaerã
 jêingo emee eã ure abe je quiatu re? —iMbae mo
 nandesi teã eo si jê! ure que equia oso mose jen-
 dea ra. Dios si jembicha eã sacua ño ngue mbae

mo ureisi teã nguiã jěsi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ũquí ndiqui ofrenda u u bei ae, i que Dios ñee cose ra. ¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiato ataque riqui mbae mee mee mbei ũquí je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jěsi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jěje co. Tamano ae, “mbae embu seje”, i rocoĩ jěje. ¹⁶ Dios cheẽ nenei neneisa tuchi chõ se re. Ũquí ni seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ũquí ño sebi re. —Mbae mo embu seje Dios cheẽ nenei nenei ndibishorõ, ae ãte quia co. Ũquí nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbasa rui nae, ũquí ite re seico mose, Moisés chimbasa asaã saã ño nguiã se abe. Ũquí Jesucristo icua

sacua. — Moisés chimbese rui eico, i ãte raque Dios seje. ²¹ Ae siquiã nguia Moisés chimbese cheẽ ndui nae, ãquĩ ite re seico mose, se abe Moisés chimbese asaã saã eã ño nguia cote. Ûquĩ Jesucristo icua sacua. Cristo mii ñee ño amumba mumbayã nguia co. ²² Jesús quiato quirãcuã nea ite re seico mose, ãquĩ asaã saã ño nguia se abe, sequirãcuã nea naa naa. Ûquĩ Jesucristo icua sacua. Ae ite re aico oso oso beite nae, ãquĩ na ño aico nguia se abe. Ûquĩ Jesucristo icua sacua. ²³ Ûquĩ ja chõ asaã saã nguia Dios cheẽ turã nii co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co mii ño nda premio isi. Aque rã tuchi chõ jẽingo Jesús rese. Premio isi sacua naanguia. ²⁵ Ae ra carrera saã saã nae, ãquĩ mbae icua secha ja chõ nguia ãquĩ. Premio isi sacua ño eriqui nguia mbae icua naa eã. Premio nda ua jei raque. Ae Jesús mee arõte quia nande je premio nae, ãquĩ nguia ra ua eã mbei nandesi. ²⁶ Se aico choõnoa nguia Jesús rese co. Jesús rese aico turã tuchi chõ nguia se co. ²⁷ Mbae asaã saã ño nguia serete mbirãcuã co. Serete secheẽ mumbayã sacua. Se premio ganar i sacua ño aico nguia eraã naa co. Premio isia sebiãte, se Dios cheẽ nenei nenei tuchire. Nyebe aico nguia siqui tuchi Jesús rese co.

10

Dios raanguia rese ra jẽingochĩ jẽ

¹ ¡Jẽtesareichĩ nda nandei ñiinda si jẽ! ¡Moisés mosenda si jẽ! ¡Ûquĩ ngue siqui ja rei ibeishĩ ndui

ra jê! ¡Ûquĩ ngue nyoĩ ja rei Ama Ireĩ ndasa Dios ñee mose ee ra jê! ²—Moisés rese nandeico bei, i ja rei que mbia siqui ja mose ibeishĩ ndui ra. — Moisés rese nandeico bei, i ja rei que mbia Ama Ireĩ ndasa mose ra. ³ Ae Dios mee ndei ee echiurã nae, ãquĩ ngue mbia ja u u rei ra. ⁴ Ae Dios mee ndei ee embei sacua nae, ãquĩ ngue mbia ja mbei mbei rei ra. I que tuutu quia sita si nae, ãquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ãquĩ mbia rese ra. ⁵ Ûquĩ ataque rese que Dios ia eã tuchi riqui ra. Siqui turã eã tuchi que equia Dios ruĩ ra. Nyebe Dios eataque iquia iquia nguiã turúquiaa.

⁶ Nandemundua sacua ño ãquĩ nde. Mbae icua oseĩ oseĩ eã sacua nande chõ ãquĩ nde. Sã ãquĩ mbae icua oseĩ oseĩ no. ⁷ Jẽingo chĩ nda dios abareã ndese. Sã ãquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jẽ nguia jẽingo eã dios abareã ndese. ⁸ Ûquĩ nandei que siqui siqui ngũinisiã ndese no nda. Nyebe Dios eiquia iquia tuchi nguiã. Veintitrés mil que mano aque nyaashĩ mose ra. ¡Mbae icua nda nandesaã saãchĩ ãquĩ na jê! ⁹—Ma Cristo roseĩte, nandechĩ nda mbae icua naa jê. Sã nandei riqui “ma Dios roseĩte” i nyii no. Sã ñi ngue eriqui mbae icua naa mbei cose no. Sã mbei tásie riqui eiquia iquia no. ¡Ûquĩ nandesaã saã eã tuchi chõ nguia nande jê! ¹⁰ ¡Jeñee icua icua chĩ nda Dios rĩ jê! Sã ãquĩ nandei ñee icua icua nguia Dios rĩ no. Nyebe ángel nandei ñiinda iquia iquia tuchi nguiã. ¹¹ Eĩ

si tuchi que nandei ñiinda quia nyii ra. Dios que embeşa mii nandetesarei eã sacuañ nda. Mbae ua ja serii mose chõ Dios riqui nguiã nandembesarei eã co. ¹²—Sequirãcuã tuchi chõ se re, i mose emo, jsã aque riqui nyiiicua tuchi quiatu jẽ! Mbae icuã jei nonde ee. ¹³—iMbae icuã esaã jẽ! i mose diablo jẽje, eĩ si chõ nguiã ñee mbia ataque je. Jẽ mii je eã. Dios quia ra ucheẽ mbuchebiã mbei. Jendeaquiato bei ra diablo ñee mose jẽje. Jembirãcuã ndae. Jẽ “nya” i sacuañ mbae icuã je.

¹⁴ Seresenda, idios raanguia rese ra jẽingochi jẽ! ¹⁵ Jẽaracuate rei jẽ ndesẽ. Secheẽ ndese jemaie quiatu. ¿Acheẽ ñooño se re? Acheẽ ñooño eã se reae. Jẽtea quiatu. ¹⁶ Nande Santa Cena naa naa mose, Cristo ruqui mbei raanguia chõ nandeico nguiã uva rique mbei mbei. —Cristo ruqui nandembitirõ ja bei quia ã, i chõ nguiã uva rique mbei mbei. Mbichae nandesiquio quio quia eu nonde nae, Cristo roo rã ño ũquiñ nde. —Cristo roo nandembitirõ ja bei quia ã, i chõ nguiã mbichae u u. ¹⁷ Nandetubiriãte raque Jesús quiato. Nande ja chõ aque mbichae mii nandeu ja nguiã. Mbae mii na nguiatu nandeico nguiã nande ja ã. ¹⁸ Judíos rese chõ jendua. ũquiñ sacrificio raã naa mose, sacrificio eu chõ nguiã ã. —Dios resete quia nandeico nguiã ã, i equia ã. ¹⁹—Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ũquiñ. ²⁰ Mbia soo mondo mondo mose dios abareã je, Dios tuchi je eã ño eriqui nguiã emee mee. Aba checuayã icuã je chõ eriqui nguiã emee mee. ¡Aba checuayã icuã ndese ra jẽingo jiri jirichĩ

jê! ²¹ Jê mbae mbei mose aba checuayã ndese, Jesús ruqui mbei raanguia jêsaã aronea ño nguiã cote. Jêquiaru quiaru mose aba checuayã nyuchua, Santa Cena jesaã aronea ño nguiã cote. ²² ¿Mbaerã jêingo Jesucristo mbupaama ite re? ¿Jêquirãcuã tuchi chõ eriqui esi jê nde?

Jesús quiato ataque rese quia jêingo ndua

²³ —Ae soo mbia mee mee nguia dios abareã je nae, ùquĩ ndese ra jêocochĩ, i ãte raque Dios nande je. Dios biãte nande mbae raã ja chooño mose. Ùquĩ nii Dios ñee ãte raque nande je. Nande ae chõ nandeicua. Mbae mo Jesús quiato mo mundua icuã mose, ùquĩ si nandehui chõ. ²⁴ —Nande ae nandeico Dios rese, jenyechĩ nda jê. —Mbia ja quiatu nandemingo erese, jenye quiatu. ²⁵ Soo jêisichõ ño nguia mbae vender ísaa. —¿Dios abareã je co soo jemondo nyii re? ¡jenye chĩ nda ñee ee jê! Jêiranua mose, mbaeiaie eã ño soo jêje cote re. Jêisichõ ño nguia jêiranua. ²⁶ Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùquĩ ndei nandechiurã ja. ²⁷ —Nyao rã quiaru serese, i mose emo jêje, jêso chõ quiaru erese jêsose mose. Ae ra echara mondo jêje, jêuchõ ño. —¿Co mbia mondo dios abareã je nyii re? jenyechĩ nda ee. Jêiranua mose, mbaeiaie eã ño jêje cote re. Jêiranua ño jêquiaru. ²⁸ —Co soo que mbia mondo dios abareã je ra, i mose emo jêje, jêu eã ño cote. Ae ñee jêje nae, aque mbicua eã sacua ño jêu eã. Aque soo jêu eã cote, jêirandu mose erese. Jê eu mose, Jesús quiato ra ndua icuã icuã cote. ²⁹ Jendua icuã eã ndaque jê. Emo nguia ndua

icuaã arõte nguiã cote, jirandu mose jẽ eu rese. —
 ¿Mbaerã nda aque soo au eã sebi mose re? i arõte
 jemo seje. —¿Mbaerã nda emo ñee amumbayã
 nde? i arõte jemo seje. ³⁰—Se “gracias” i mose
 Dios je aque soo u nonde, eicuaã eã ño cote reae.
 ¿Mbaerã nda emo ñee icuaã seje re? i arõte jemo seje.
 —¿Mbaerã nda au eã eicuaã eã mose re? i arõte jemo
 seje.

³¹ ã ndese chõ jendua. Ae nandesaã saã nguia
 nae, Dios je chõ nandesaã. Ae nandeu ndeu quia
 mbae nae, Dios je chõ nandeu. Ae nandembei
 mbei quia mbae nae, Dios je chõ nandembei no.
 Mbia ra ñee turã Dios je, nandeico turã mose.
³² iMbia ra jemundua ata atate chĩ jẽ! —ã icuaã
 ereae, i mose emo jẽje, iũquĩ nda jẽsaãchĩ jẽ! Jẽ eraã
 mose, ũquĩ nda ndua icuaã Jesús rese cote. Judíos.
 Judíos eã abe. Jesús quiato abe. Ũquĩ ndua icuaã arõ
 Dios rese, jẽ eraã mose. ³³—Se ae taico Dios rese,
 ae ate quia co. —Mbia ja quiatu tamingo erese, ae
 quia cõ. Dios mbia rirõ sacuaã eicuaã si. Mbia siqui
 bei sacuaã Dios rese.

11

¹ Se rã si chõ jẽingo. Sã aico Cristo rã si se no.

*Eĩ jenye chõ nguia u ñumunua nua mose, i Pablo
 cuña je*

² Acheẽ turãte quia jeni co. Jendua beite quiatu
 quia serese. Acheẽ ngue jẽje nyii, ũquĩ jemum-
 bayã mbeite quia secheẽ ũquĩ. ³ Ae ra ambesa
 jẽje namo, iũquĩ jẽicua tuchi quiatu jẽ! Cristo rei
 hombre ja rerecua. Hombre rei ngũinisi rerecua
 no. Sã Dios Cristo rerecua no. ⁴ Mbia ñumunua

mose, sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ũquĩ. ⁵ Mbia ñmunua mose, sã cuña mo ñee eã Dios je huiite suchayã. Sã cuña ãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ũquĩ. Uãquĩ huĩ na ño eriqui nguiã uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguiã Dios cheẽ nenei nenei. Dios quiatu ngue hombre chao nguiã umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguiã. Hombre roquieĩ je quiatu ngue Dios cuña mo ao nguiã. ⁹ Cuña chirecorã eã ño ngue Dios hombre ao nguiã. Hombre chirecorã nguiatu ngue Dios cuña ao nguiã. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguiã uãquĩ ati. Angeles quia maete nguiã erese. ¹¹ Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹² Hombre roquieĩ je chõ ngue Dios cuña ao rei nguiã nyii. Cuña abe riqui tiirĩ irĩ hombre co cote. Dios chiao ja chõ ñene. Cuña. Hombre abe. ¹³ Jẽ ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siqui mose, aba ireĩte ũquĩ. —Eicuãte ũquĩ, i ja tuchi mbiamo ñooñoa nguia ũquĩ je ã. ¹⁵ Cuña mo nguiatu ea boco siqui mose, ũquĩ nguia earõte re. Ea boco que Dios mee ee ra. Eãquĩ ati sacua. ¹⁶ —Cuña a boco sebiã, i mose jemo, sã ndua chõ Jesús quiato ataque rese.

—Sã cuña a boco riquichõ, i ja chõ Jesús quiato nguiã serese ùqui.

Jenyao chaochĩ nda Santa Cena u mose jẽ

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jenĩ nda. Nyebe seya eãte riqui nguiã jendese.

¹⁸ —Hue rĩ ja eã eriqui ndua ndua ñumunua nua mose ùqui, i que emo sembiirandu jenĩ nda. —Ichõño eã ereae, ae sequia ndua ndua co.

¹⁹ Jenĩmbuchao chao chõchĩ equia ùqui. Mbia Jesús quiato tuchi icua sacua ño jenĩmbuchao chao nguiã. ²⁰ Santa Cena naa naa mose, abei chiã tuchi chõ jẽingo nguiã jenyue ùqui. Eĩ eã tuchi que Jesucristo nandembaaquiato ra. ²¹ —Se rane sembae tau ja, jenyue jaaja chõchĩ nguiã Santa Cena naa naa ùqui. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jẽquiaru tuchi mose Santa Cena, jẽingo icuã ño nguiã Jesús quiato ataque je ùqui. Mbaecha reã ireĩ ireĩ ño nguiã jẽsi ùqui. ¿Mañi ae ra ñee jẽje re? Eicuãte ùqui ndesẽ. Jenyuchua ae ae rei jẽquiaru sacua ndesẽ.

Jesús quiaru mose uchĩmbaaquiato rese

²³ Jesucristo ae sí que sembaaquiato ra. Ñ ngue asenei ndei jẽje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchĩmbaaquiato je cote ra. —¡Co jẽ! Jẽu. Serete rã ño mbichae riquio ji co re. Jenĩ ño nda serete riquio ji cote. Co jẽu mose, jendua ndua bei quia serese, i que Jesús

mbichae mondo ee ra. ²⁵ Quiaru jare que Jesús eyuquia rirō cote ra. Ñee ngue uchimbaaquiatu je cote ra. —Seruqui rã ño uva rique co re. Mbia icuã mbutiã sacuã tuchi chō seruqui re. Dios cheẽ yasu rui si chō seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶ Jẽ co mbichae u mose, jẽ uva rique mbei mose, Santa Cena, i chō nguiã ũquĩ je. Jẽ Santa Cena naa naa mose, Jesucristo mano nenei nenei ño nguiã mbia je ũquĩ. Santa Cena jẽsaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ũquĩ siqui icuã icuã ño nguiã Jesucristo rete je ũquĩ. ũquĩ siqui icuã icuã ño nguiã Jesucristo ruqui je ũquĩ no. ²⁸ Nyebe nandendua ndua tuchi quiatu quia Santa Cena naa nonde. ²⁹ Emo Santa Cena naa icuã icuã mose, emo ndua eã mose Jesucristo rete rese, ũquĩ nda Dios mbasi. ³⁰ ũquĩ je chō jendasi rasi bei riqui nguiã. ũquĩ je chō jẽingo nguiã mano mano tuchi. ³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacuã ño ũquĩ nde. Nandembitirō sacuã ño cote re. Dios nandemombo eã sacuã tata cuasu chō ũquĩ nde. Jesús quiatoã mombo mose tata cuasu.

³³ Nyebe aico nguiã ñee nyecua jẽje co. Jẽ Santa Cena naa naa mose, jeñumunua nua turã ño. Jẽingo turã ño jenyue. Jenyisaarō turã ja chō Santa Cena u nonde. ³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenyee mose,

Dios ra siqui turã jêje cote, jeñumunua nua mose. Seso mose jendea ra secheẽ ataque asenei jêje cote.

12

Espíritu Turã ño nandechisaã saã sacuaã mondo nguiã nande ae ae je

¹ Espíritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. Ñquĩ ndese taembiirandu cote. ² Dios abareã ndese que jẽingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheẽ andu aroneãte. Ñquĩ jẽingo Jesucristo rese ñquĩ cote. ³ ã ndese jendua tuchi: —Jesús icuãte riqui Dios je co, i mose emo, echeẽ ae chõ ñquĩ nde. Espíritu Turã embucheẽ eã ño nguiã ñquĩ. —Jesús rei Dios tuchi, i mose emo, echeẽ ae eã ño ñquĩ nde. Espíritu Turã ño embucheẽ nguiã ñquĩ.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo. ⁷ Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacuaã Dios rese. ⁸ Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiату turã mbei quia, i chõ nguiã nandemo je no. ⁹ — Jesucristo ra ereicua tuchi quia nde, i chõ nguiã

nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. ¹⁰—Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Eturaã icua. Eicuaã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹ Eĩ ño Espíritu Turã mii nguiã ucheẽ mbuchao chao nande je co. Nandehisaã saã sacuaã mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na.

¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã. ¹⁵ Nandei achõ ñee aroneate. —Eo eã ñochĩ se. Nyebe erete resenda

eã se re, i aroneate nandei ñee. Nanderete resenda bei chõ nandei re. ¹⁶ Nandeisa achõ ñee aroneate. —Eresa eã ñochi se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re. ¹⁷ Nanderesa achõ mose nanderete resenda, i nda nandeico rei mbae anuate co. Nandeisa achõ mose nanderete resenda, i nda nandeico rei mbae retõ ãte co. ¹⁸ Dios ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda. ¹⁹ Nanderete resenda mii mose, ei ndei ra nanderete eãte. ²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. ²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquí nandei je no. ²² Ae nanderete resenda ñetẽ tuchi nae, ae nanderete resenda quirãcuã nea tuchi nae, ãquí nguiarei nandechireco tuchi. ²³ Ae nanderete resenda aba ireĩte nae, ãquí nandetea quiatu chõ nguiã. Nandechati turã ño nguiã. ²⁴ Ae nanderete resenda checuate riqui nae, ãquí nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ãquí quiatu aba queteamba re. ²⁵ Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ ã ño secheẽ tuchi ã nde: Cristo rete rã ño

nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguia nde, i chõ nguiã emo je no. —Mbia rasi embucherõ cherõ nguia nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguia nde, i chõ nguiã emo je no. ²⁹ Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ãquĩ mo asaã saã se abe, nande quia ñee Dios je. Mbae turã tuchi mo tasenei na jẽje.

13

Nandechesecua eã mose, Dios chirirõ ño nandre

¹ Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi

raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³ Se nyesequa eã mose mbia rese, aico chooño mbei chõ nda se. Sembae ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

⁴ Ae nyesequate quia mbia rese nae, ãquĩ nguia siqui minguete nguia mbia je ã. Ûquĩ nguia eturãte riqui nguia mbia je co. Ûquĩ nguia mae icuã icuã eãte nguia emo mbae rese ã. Ûquĩ nguia “seaquiatu tuchi se”, iãte nguia co. ⁵ Ae nyesequa quia mbia rese nae, ãquĩ nguia “se quiatu”, iãte nguia mbae mo je. Ae aba ireĩte nae, ãquĩ mo esaã saã eãte quia co. Ae nyesequa quia mbia rese nae, ãquĩ nguia paama i jei jei eãte nguia ã. Ûquĩ nguia ndua icuã icuã eãte nguia emo icuã mose ee ã. ⁶ Ae nyesequa quia mbia rese nae, ãquĩ nguia eya eãte riqui nguia, emo mbae icuã naa mose ã. Emo mbae turã naa mose quia eyate riqui nguia ã. ⁷ Ae nyesequa quia mbia rese nae, ãquĩ ñimbirãcuã ño nguia mbae ja je ã. —Ihchõ:ño nguia, iã ño nguia mbia cheẽ je. Siqui tochi chõ nguia.

⁸ Dios quiato ra nyesequa bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nadesaã eã emo mose cote. Mbia mbaaquiatusa mo eã nda emo mose cote. Ûquĩ nda ua ja chee. Dios quiato quiatu ra nyesequa bei quia. ⁹⁻¹⁰ Mbae mii mii ño nandeicua icua nguia namo ã. Jesús tu mose quia ra mbae mii nandeicua eã cote. Dios cheẽ miite nandesenei senei nguia namo ã. Jesús tu mose quia ra mbae nandeicua ja cote. ¹¹ Señetẽ mose

que aico ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbae que aicua icua chõ nguia mbia riirĩ na no nda. Secuasu mose que señetẽ mosenda asecha ja cote ra. ¹² Mbae cuu rese mae naanguia chõ nandeico nguiã mae namo. Jesús tu mose quiatu ra mbae checua ja nande je cote. Mbae mii mii ño aicua icua nguiã namo co. Jesús tu mose quia ra mbae aicua ja cote. ¹³ ã nandeico Dios icuate ã. ã nandeico Jesucristo ru raarõ arõ ã. ã nandeico nyesecua jate mbia rese ã. Nandechesecua mose quiarei, ãquĩ eturã tuchi mbae ja si.

14

Mbiamo cheẽ naa naa mose

¹ ¡Jenyesequase tuchi quiatu quia mbia rese jẽ! Jeñee ño nguia Dios je. —Paba, ndequirãcuã emee na seje. Mbae raã naa sacua ndeje, jenyee bei chõ nguia Dios je. —Ndecheẽ asenei senei sete ndequirãcuã je, jenyee chõ nguia ee. ² Jesús quiato mo mbiamo cheẽ naa naa mose, mbia ra eicuayã jate. Dios mii ño nda eicua nguiã. Dios mii je chõ eriqui nguiã ñee. Uchue si chõ eriqui nguiã ñee. Mbia quia echeẽ icuayãte nguiã. ³ Ae Dios cheẽ senei senei nguia, ãquĩ nguia ñee nyecuate nguiã mbia je. ãquĩ nguia mbia mbaaracua turãte nguiã Jesucristo rii. ãquĩ nguia mbia mingo uquia tuchi nguiã Jesucristo rese no. ãquĩ nguia mbia mbia tuchi nguiã Jesucristo rese no. ⁴ Ae mbiamo cheẽ saã saã nguia nae, mbia mingo uquia reã ño nguiã Jesucristo rese. Ae ae umingo uquia nguiã erese. Ae Dios cheẽ senei senei nguia nae,

ũquĩ nguia Jesús quiato mingo uquiate nguĩã Jesús rese. ⁵ Mbiamo cheẽ nda jêsaã aquiatu ja raquete seje chã. Dios cheẽ nenei nenei aquiatu mose, ũquĩ nguia eturã tuchi re. Ũquĩ nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiassa mose Jesús quiato je, eturã ño ũquĩ no nde. Jesús quiato mingo uquia chõ nguĩã Jesús rese ũquĩ.

⁶ Se mbiamo cheẽ naa naa mose jêje, ũquĩ nda jemingo uquia reãte Dios rese. Se ñee nyecua mose jêje, ũquĩ nguia eturãte re. Ae rese Dios sembiirandu nae, ũquĩ nenei nenei mose jêje, ũquĩ nguia eturãte re. Se Dios cheẽ mbuchecua tuchi mose jêje, ũquĩ nguia eturãte no nde. Se Dios cheẽ icua icua tuchi mose jêje, ũquĩ nguia eturãte no nde. Mbiamo cheẽ naa naa si. ⁷ Sã música no. Emo flauta mbucheẽ icuã icuã mose, mbia ra tonada icuayãte. Emo guitarra mbucheẽ icuã icuã mose, mbia ra tonada icuayã no. ⁸ Sã soldados no. Emo corneta mbucheẽ icuã icuã mose, soldados ra icoquiataũ. ⁹ Eĩ si chõ jê no nde. Jê mbiamo cheẽ naa naa mose, mbia ra jeñee icuayãte. Jê mbiamo cheẽ naa naa mose, mbia eãsa ñee ñee na ño ũquĩ nde. ¹⁰ Mbia cheẽ ñumumbarate eriqui rei. Ucheẽ ae raã naa mose, echecuate ee. ¹¹ Emo ucheẽ naa naa mose seje, se eicuayã mose, mbiamo ño aico nguĩã ee. Mbiamo ño ae riqui nguĩã seje no. ¹² Espíritu Turã quirãcuã jenyosei tuchi quia reae. Coche tuchi chõ ũquĩ nde. Jesús quiato mingo tuchi sacua Jesús rese chõ equirãcuã jenyosei jê.

¹³ Nde mbiamo cheẽ naa naa mose Jesús quiato je, echeẽ na Dios je. —Paba, ndequirãcuã emee na

seje. Secheẽ mbiãsa sacuaã mbiã je, ere chõ Dios je. ¹⁴ Se mbiãmo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee. ¹⁵ Mbiãmo cheẽ abe ra asaã saã ndaque Dios je. Secheẽ abe ra asaã saã ee no. Mbiã secheẽ icua ja sacuaã. Mbiãmo cheẽ abe ra asaã saã se irasei rasei mose. Secheẽ abe ra asaã saã se irasei rasei mose no. ¹⁶ Nde mbiãmo cheẽ naa naa mose Dios je, mbiã ra ndecheẽ icuayãte. Ae eaquiãtuãte, ãquĩ nda ndecheẽ icuayãte. Nyebe eriqui nguiã ñee aroneate Dios je nderese. Nyebe nandechẽẽ sí chõ nandesaã Dios je. ¹⁷ Coche jẽingo nguiã ñee Dios je. Jeñee sí quia nda aba saã Dios je re. Jẽ mbiãmo cheẽ naa naa mose ee, jendesenda quia nda jeñee icuayãte nguiã. ãquĩ mose ra jendesenda jemingo uquia reãte Jesús rese. ¹⁸ Mbiãmo cheẽ aicua tuchite raque quia jẽsi co. Gracias, aete raque quia Dios je ãquĩ ñi co. ¹⁹ Dios quiãto ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiãmo cheẽ nda asaã eã ee. Mbiãmo cheẽ icuayãte quia ñene. Emo nda ñee oco raque ee, icuayãte rae.

²⁰ Mbiã riirĩ naate ra jẽingochĩ, Seresenda. Jenda quiãtu secheẽ ndese mbiã cuasu rã. Coche jẽingo nguiã mbiã riirĩ na mbae icuaã naa ndocoĩ.

²¹ ã ndei Dios cheẽ mbesa ji ã:

Mbiãmo tamondo rei secheẽ nenei nenei sacuaã ã serimba je.

Secheẽ nda esenei senei ndei serimba je mbiãmo cheẽ je.

Aquere ra serimba secheẽ mumba i i tuchi querabe, i que Dios ra,

i que embesa ji ra. ²² Jemo mbiamo cheẽ naa naa mose, Jesús quiatoã mundua sacua Dios rese chõ õquĩ nde. Jẽ Dios cheẽ nenei nenei mose, Jesús quiato mundua sacua ño Dios rese chõ õquĩ no nde. ²³ Jesús quiato ñumunua nua mose u, sã mbi-amo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese. ²⁴ Coche jẽingo nguiã Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicua ndese. —Seicua tuchi chõ aico se re, i ra jeñee andu mose. ²⁵ Ae rese ndua ndua uchiangui renda icua nae, Espiritu Turã ae ra õquĩ mbuchecua checua nguiã ee. Nyebe ra ngoi nguiã ndese ñee turã Dios je. —Dios riqui tuchi jendese a, i ra ñee jẽje.

Mbae jẽsaã turã turã ja chõ nguia jeñumunua nua mose

²⁶ —Eĩ jenyẽ quiatu quia ñumunua Jesús rĩ, ae ra jẽje cote. Emo irasei rasei. Emo mbia mbaaquiato quiatu Jesús rĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbia mingo ja sacua Dios rese chõ õquĩ nde. ²⁷ Mbiamo cheẽ jẽsaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa. ²⁸ Jemo echeemo mbiasa aquiataã mose, mbiamo cheẽ nda jẽsaã saãchĩ, jeñumunua mose. Jeñumunua eã mose quiatu mbiamo cheẽ jẽsaã saã jẽ ae Dios je. ²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua õquĩ ñee ndese. Eĩ ngue ra, i sacua. Eĩ eã ngue

ra, i sacuã abe echeẽ icuã mose no. ³⁰ Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacuã. Mbia siqui tuchi sacuã Dios rese. ³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chĩ mose Dios cheẽ nenei nenei. ³³ Jemo ñee mose jenongue cheẽ cúa, Dios biãte ũquĩ. Jeñee turã mose nyuuru uru, ũquĩ nguia Dios bite re. Eĩ ja chõ Dios quiato nguĩã iglesia jenda ja. ³⁴ Jeñumunua nua mose Dios riĩ, cuña mo nda ñeechĩ. Eĩ si que Moisés chimbesa no nda. Sã cuña ndiqui mbia cheẽ mumbayã mbei. ³⁵ —Ũquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatuse mose. Cuña mo ñee aroneate Jesús quiato chumunua nua ite re. ³⁶ —Ichõiño nguĩã ¿jenye quia secheẽ mose re? Jẽ nane je eã ngue Dios ñee ndesẽ. Jẽ mi je eã ngue Dios ñee ndesẽ.

³⁷ Secheẽ ae eã ambesa nguĩã jẽje co. Dios cheẽ ño ambesa nguĩã jẽje. —Dios que uquirãcuã mee seje ra. Ucheẽ nenei nenei sacuã, i mose jemo ñee, sã ũquĩ nane ñee serĩ. —Dios cheẽ tuchi chõ Pablo senei senei nguĩã, sã i serĩ. ³⁸ Ũquĩ secheẽ isi sereã mose, jẽhui chõ esi. Sã eaquiataũ ae riqui. ³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose ¡echeẽ nda jẽsiquisã quisãchĩ jẽ! ⁴⁰ ¡Mbae jẽsaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo rĩĩ nae, ũquĩ sí rese chõ aico nguia jemu-ndua ndua co. Ũquĩ ngue jẽisi turãte. Jẽingo beite ũquĩ ndese ũquĩ. ² Ũquĩ ndiqui jemingo beite ũquĩ, jẽtesareia mose secheẽ si. Ũquĩ jẽingo Jesucristo icua iruã ũquĩ. ³ Ae Dios senei senei seje nae, ũquĩ nane ngue asenei senei jẽje ra: Jesucristo que mano nandeicuã ndiquicharõ. Embesa ji cheẽ nguire. ⁴ Mbia que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchimbaaquiatu doce je cote. ⁶ Quinientos uquiato je que nyecua cote. Hue equiato chi ja mose ñumunua. Ũquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchimbaaquiatu jaje cote. ⁸ Nyecua nyecua jare mbia je que nyecua chee se abe je cote ra. Sã cuña ndiqui erã mo mbua no, ũquĩ na si chõ aico rei nguia se co. ⁹ Se quia señetẽ jiri riqui nguia Jesús chimbaaquiatu ataque si co. —Jesús chimbaaquiatu chõ se re, ae eã jiri quia co. Seicuã tuchi quiatu ngue Dios quiato je nyii re. ¹⁰ Dios turã ae semingo turã nguia co cote. Dios turã ñooño eã ño eriqui nguia seje co. Se abe que serecoteã jiri riqui nguia Jesús rese echimbaaquiatu ataque si ra. Mbae raã naa Jesús je. Se ae eã ño ngue aico nguia mbae rese. Dios turã ae ngue semingo nguia mbae rese. ¹¹ —Aba Dios cheẽ senei senei tuchite quia reae, ure ãte

equia co. Ũquíã ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbia raaque quera si mose

¹² —Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re. ¹³ ¿Cristo raaque bei namo nde? —Mbia raaque ra querayã mbei, jenyẽ mose, ¿mañi Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jẽicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios rĩĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no. ¹⁶ Mbia raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicua nderequia beite no. ¹⁸ Eĩ nda Cristo quiato quiachã mbei rei manonde no. ¹⁹ A miĩ eã ño Cristo riqui nguiã nanderese. Nandemanonde abe ra eriqui bei nanderese no. A miĩ mose, eĩ nda nandeya eã tuchite riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹ Adán miĩ nane ngue mano huicua je cose ra. Nyebe nandeico nguiã mano mano mbei cote. Eĩ si chõ Cristo miĩ quera si nguiã cote. Nyebe ra uquiato mbuquera si ja cote. ²² Sã nandeico mano

mano ja Adán ndui ã no, eĩ si ra Cristo nandembu-
 quera quera no. ²³ Dios que Cristo rane mbuquera
 nandesĩ ra. Cristo tube mose, uquiato raaque ra
 embuquera ja cote. ²⁴ Cristo tube mose ra mbae
 ibi jenda ua ja cote. Mbia mo nda siquíã ererecua
 cote. Cristo ra mbae mee ja Dios je cote. Cristo ra
 mbia rerecua mbutiã ja cote. ²⁵ Ererecuarã tuchi
 ra Cristo cote. Uquiatoã nda embuquiachã ja tuchi
 chee cote, ae siqui mose ererecuarã. ²⁶ Mbia mano
 mano mose, Cristo biãte ũquí. Ũquí abe ra Cristo
 mbuquiachã tuchi mbia si cote. Mbae icuã ataque
 ra embuquiachã ja rã nyii. ²⁷ Dios que mbae mee
 ja Cristo je ra. Cristo mbae rerecua ja tuchi sacuã.
 —Cristo ra mbae rerecua ja tuchi, i ñi embesa ji re.
 Dios rerecua eã ndaque. Mbae ja rerecua chõ nda
 Cristo. ²⁸ Dios mbae mee ja mose Cristo je, Cristo
 ra ñimee Dios je cote no. Eriirĩte quia ñene. Eĩ nda
 Dios mbia rerecua ja tuchi cote.

²⁹ Emo emo ño bautizar i nguiã eraaque rĩ ũquí.
 Eraaque quera si eã mose ¿mbaerã ũquí ndiqui
 bautizar i eraaque rĩ nde? ³⁰ Mbia raaque quera
 eã mose, eĩ nda ureico rei Dios cheẽ nenei nenei
 ãte mbia je co. Eĩ nda mbia riqui rei ureiquia
 serĩ serĩ ãte. ³¹ Mbia “taiquia” i bei beite quia
 seje ã. Acheẽ ñooño eãte jėje. Sã seyate riqui
 jendese co no. ³² Nyacua rã tuchi que Efeso jenda
 riqui seje ra. Ũquí ngue asiquisã tuchi rei quia
 ñee nda. Eĩ nda asiquisã quisã iru rei no, mbia
 raaque quera eã mose. Mbia raaque quera eã
 mose, eĩ nda nandeico rei ñee. —Mbae nandembei
 chooño. Mbae nandeu chooño. Mano mbei cote, i.
³³ —Eĩ jenye quiatu ¡ichĩ nda mbia jembĩrĩ irĩ jẽ!

Jeingo mose mbia icuã ndese, jemb#icuã icuã nda jẽ abe cote. ³⁴ Jendua quiatu. Mbae turã nguiatu jẽsaã saã nguia. Mbae icuã jẽsaã eã nguiatu quia. Jemo emo ndiqui Dios icuayãte ãquĩ. Aba ireĩ tuchi quiarei ãquĩ.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae. ³⁶ Ndua eã ño nguiã ãquĩ. Sã nandeico mbae eĩ tiquia no. Mbae eĩ nda soõ suri sacuã cote. Eĩ si chõ nda nanderete soõ nandemano mose. Nanderete yasu sacuã cote. ³⁷ Sã nandeico mbae eĩ tiquia no. Ei ra nandechitiquiayã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote. ³⁸ —I ño nda ndei, i chõ Dios nguiã mbae eĩ jaje. ³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa r#nda rete no nde. Ae mbebe quia, erete ae chõ ãquĩ no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ãquĩ ndei soõ je ãquĩ. Ae ra quera si nae, ãquĩ nda soõ eã mbei cote. Manoa mbei ra eno. ⁴³ Ae nandechitiquia quia nae, eraaque tuchi chõ ãquĩ nde. Ae ra quera si nae, enininya tuchi chõ ãquĩ cote re. Etiquia mose,

equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴ ã nanderete nandereco ã nae, erete achõ ño ãquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ãquĩ nda manoa no. ⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque. ⁴⁶ ã nanderete nandereco ã nae, mano mano mbei arõte. ãquĩ nane nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ãquĩ cote. ⁴⁹ Ae Dios chao ibi je nyii nae, Adán i equia ee nae, aque rã si chõ nandeico nguiã nande abe namo ã. Aquere ra nandeico ibatenda rete rã cote. ⁵⁰ Nanderoo achõ ño nanderete re. Nanderuqui abe no. ãquĩ oso aroneate ibate Dios récuaa. Ae mano nguia soõ nae, ãquĩ nyo i aroneate Dios récuaa. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ãquĩ tasenei na jẽje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde

cote. Aque mose ra nandechiicabo bei nande abe cote. ⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴ Nanderete nyiicabo mose, ãquĩ mose ra embesa ji cheẽ io cote: “Nandemano ngue ua tuchi cote ra”, i ñi embesa ji re. ⁵⁵ Nanderasi ra nandequiayã cote. Ibicua ra nanderaarõã cote. ⁵⁶ Nandecuã ño nandemano mbu uquia nguiã nande je co. Moisés chimbesa chõ nandecuã mbuchecua nguiã nande je co. ⁵⁷ Dios ra nandemano siquisã mbei nandesi cote Jesucristo riĩ. Nyebe nandeco nguiã gracias i tuchi Dios je ã cote. ⁵⁸ Seresenda ¡jeñimbirãcuã tuchi quiatu quia jẽ! ¡Jesucristo rese jẽingo bei quiatu quia jẽ! ¡Echeẽ jẽsenei senei mbei tuchi quiatu quia jẽ! Ae jẽsaã saã nguia Jesucristo rese nae, jẽsaã iru iruã ño nguiã ãquĩ.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ãquĩ tasenei jẽje. Acheẽ ngue Jesús quiato je ra. Galacia jenda je ra. Eraã si chõ jẽingo ae. ² Domingo mose bei jẽingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi miite quia, sã aque co miĩ jiri rerecúe ofrendarã ae. ãquĩ jemunua ino seso nonde jendea ae. Eĩ mose ra ofrendarã jẽsaã eã seico mose jendese cote. ³ Secuasẽ mose huee, jeñimondo sacua mo jẽirabo ino, ofrenda rerao sacua. Cartas nandemondo ãquĩ oo. Ofrenda rese. ãquĩ nda amondo Jerusalén ña. Ofrenda rerao

sacuã hue jenda Jesús quiato je. ⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jêje cote. ⁶ Aico arete jiri ra jendese huee reae. Ama mose bei ra aico jendese huee reae. Eĩ jenyẽ nda sembucuata turã mondo cote, seso mose mbaranguiti. ⁷ Amaeño sereãte jendese secua mose. Aico arese rete jendese huee, Dios eno i mose seje. ⁸ Efeso taico are rã nyii. Fiesta de Pentecostés mose. ⁹ Dios cheẽ asenei senei arõ tuchi mbia je a. Mbia seanduse rete. Emo emo icuã icuãte riqui Dios cheẽ nenei nenei mose seje ã no.

¹⁰ Timoteo ngasẽ mose jêje ¡jêisi turã ño jê! ¡Sã eireĩ nguã tuchi jêsi jê! Se rã si chõ eriqui bei nguã Dios cheẽ nenei nenei mbia je aque. ¹¹ ¡Nyebe jemo Timoteo isiteã eã jê! ¡Jembucuata turã ño imbu seje jê! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. — Nde abe eso erea, ae rei que ee jeni nda. Oso sereã ngue namo nda. Osobi mose quia nda esi nguã jendea cote.

Pablo ñee hui bei

¹³ ¡Jendua tuchi quiatu quia jê! ¡Jesucristo jêicua tuchi quiatu quia jê! ¡Jêsiquicheã tuchi quiatu quia jê! ¡Jêquirãcuã tuchi quiatu quia jê! ¹⁴ ¡Mbia rese jenyesequa tuchi quiatu quia mbae raã naa mose jê! ¹⁵ Seresenda, jêingo Estéfanos chuchua jenda icua jate ãquĩ. Ñquĩ nane tuchi ngue Jesús icua Acaya jenda nyii nae. Ñquĩ ndiqui mbae mondo

mondo bei Jesús quiato je ùquĩ. Ùquĩ ndiqui mbae raã naa mbei Jesús quiato je ùquĩ. ¹⁶ Ùquĩ na si chõ jêingo. Ùquĩ ñee nda jemumbachĩ. Ae Dios cheẽ senei senei nguia nae jũquĩ ñee nda jemumbachĩ jê! ¹⁷ Seya tuchi Estéfanos ngaẽ mose serea. Fortunato abe. Acaico abe. Ùquĩ ngue sembia tuchi ngaẽ jêingoã mose a ra. Ae jêsaã aroneate quia seje nae, ùquĩ ño ngue esaã ngaẽ seje a ra. ¹⁸ Ùquĩ ngue sechiã mbucoite Dios rese ra. Jeñia abe mbucoite ereae. Gracias jenye bei ùquĩ je.

¹⁹ Jesús quiato Asia jenda ja chõ saludos mondo quia jêje aque. Aquila abe saludos mondo quia jêje aque. Priscila abe. Ae Jesús quiato ñumunua nua nguia ùquĩ nyuchua nae, ùquĩ ja abe saludos mondo quia jêje Jesucristo rĩĩ aque. ²⁰ Jesús quiato a jenda ja saludos mondo quia jêje aque. Jenyiquiaama ama ja quiatu quia Jesús rĩĩ.

²¹ Seo je tuchi co saludo ambesa mondo quia jêje aque. Pablo tuchi chõ se re. ²² Emo nyesequayã mose Jesucristo rese, sã Dios embasi. Echu, Jesucristo. ²³ Jesucristo turã nda siqui jendese chã. ²⁴ Achesequa ja chõ nguiã jendese Jesucristo rĩĩ co. Amén.

Mbia Cheë **New Testament in Sirionó (BL:srq:Sirionó)**

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
eb2687f2-4654-5d43-8ec2-3ee35e8a435e